



12. august 2011

EM 2011/134

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Angajoqqaarsiat aamma ilaqutariit oqilisaasut meeqqanut paarisaminnut ilaqutaanngitsut minnerpaamik 25-nik ukioqalereersimasarnissaat aalajangersaaffigeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartuni ilaasortaqa Astrid Fleischer Rex, Demokraatit)

Tungavilersuut

Kikkut tamarmik ilisimavaat akisussaafferujussuusoq meerartaarnej, angajoqqaallu amerlanerpaat angajoqqaajunerat qujanartumik ajunngitsumik ingerlasarpoq, angajoqqaat meerarlun ingerlalluarterlutik. Kisianni aamma angajoqqaarpaalussuaqarpoq, angajoqqaajulluarsinnaanngitsunik assigiinngitsut pissutigalugit, taamaattumik qitornatik allanut paaritittariaqartarpaat.

Angajoqqaaviit angajoqqaatut pisinnaanngikkaangata allat sulisariaqartarput. Maani Kalaallit Nunaanni qujanartumik ilaqarpugut allat meeraanik paarserusuttartunik. Tamakku angajoqqaarsiatut imaluunniit ilaqutariittut oqilisaassisartutut ilisarisisimaneqarput.

Demokraatini innuttaaqatigut akisussaaffik angisooq tigullugu allat meeraanik paarsisartut angisuumik qujamasuffigaagut. Isumaqaarpugulli pineqartumi inatsit pitsaanerusinnaasoq, sumiluunniit allassimanngimmat angajoqqaarsiaasinnaasut minnerpaamik qassinik ukioqartariaqarnersut.

Ukiut kingulliit ingerlanerini qitornartaqqaartartut nunarsuarmi tamarmik utoqqaaneruleriartorsimapput, aamma maani nunami taamaappoq. Arnat inuusuttut muteerniusut amerlasuutigut ilinniaqqaarusuttarput qitornartaartigatik. Demokraatit isumarput naapertorlugu tamanna pissusissamisoortumik Kalaallit Nunaanni ineriartorneruvoq.

Taamaattumik ullutsinni inersimanerusarpugut qitornartaaraangatta. Taamaattoqarnera angajoqqaarsianngorsinnaaneq kiisalu oqilisaassisartuusinnaanermi atuuttariaqarpoq.

Demokraatini isumarput naapertorlugu ullutsinni inuusuttut ilaqutariinnut pilersuisunngorniarlutik ilinniarnerat, inerikkiartornerat, tulluuttumik initaarnissaat suliffeqalernissaallu, ukiunik arlalinnik sivisussuseqarsinnaasartoq. Taamaattumik ukiut killigitassat 25-nut killilerusupparput.

Amerlasuutigut meeqqat tarnikkut ajornartorsiutillit angajoqqaaniit arsaarinnissutigineqartarput, angajoqqaarsiaqarnissaminnik kiisalu oqilisaassisoqarnissaminnik pisariaqartitsisut. Matumani Demokraatini aamma isumaqarpugut pisariaqartoq angajoqqaarsiannngortussat inuunermut misilittagaqarnissaat, inuusuttullu amerlanersaat 18-niik 25-nut ukiullit taamatut misilittagaqanngillat.

Taamaattumik allat meeraanik paarsiniaraanni inuttut ilaqutariittullu inerissimalluartariaqarpoq, Demokraatinilu isumaqarpugut kikkut tamarmik taamaanngitsut. Ilaqutariittut ingerlalluartuusariaqarpoq, aningaasaqarneq pitsaasuusariaqarpoq, inuttullu inerissimasariaqarpoq taamatut meeqqamik angerlarsimaffimmiik arsaarinnissutaasimasumik eqqissisimatitsillunilu oqimaaqatigiissumik peroriartortitsissagaanni.

Siunnersuummi eqqarsaatigineqanngillat qatanngutit angujullit imaluunniit ilaquttat, meeqqamik ilisarimannereersut. Ilaqutariit meeqqamik paarsaqalersimappata, imminnut ilisarimariissapput taamaattumik angajoqqaarsiaasut meeqqamut isumassuilluarnissaminnut tunngavissarissaartussaapput.

Aningaasatigut allaffissornikkullu pisortanut kingunissai.

Siunnersuutip aningaasatigut allaffissornikkullu pisortanut kinguneqarnissaa nalilerneqarpoq, inatsisissamut allannguutissaq suliarineqartussaammat, nutserneqarluni il.il. kingornalu tusarniutigineqarluni. Inatsisissatut siunnersuummik suliaqarnermi allaffimmi sulisut atorineqartussaassapput. Naatsorsuutigineqarporli inatsisitigut allannguutissaq ima mikitigisoq, suliarineqarnera pisinnaalluni Ilaqutariinnut, Kulturimut, Ilagiinnut aamma Naligiisitaanermut aningaasaliissutaareersut iluanni.

Aningaasatigut allaffissornikkullu namminersorlutik inuussutissarsiortunut kingunissai.

Siunnersuutip namminersorlutik inuussutissarsiortunut aningaasatigut allaffissornikkullu kinguneqarnaviannngilaq.

Aningaasatigut allaffissornikkullu innuttaasunut kingunissai.

Siunnersuutip innuttaasunut aningaasatigut allaffissornikkullu kinguneqarnaviannngilaq.

Taamatut oqaaseqarluta qilanaarpugut Naalakkersuisut akissuteqarnissaannut taamatullu partiit allat saqqummiussassaannut.